

**EKALESIA FAAPOTOPOTOGA KERISIANO I AMERIKA SAMOA**

**OFISA O A'OA'OGA KERISIANO**



**VASEGA MATUTUA**



**AUKUSO - TESEMA**

**2023**

**TUSIAOGA VASEGA MATUTUA – 2023**  
**FA'ASOLOGA O MATAUPU O LE TUSI.**

**ASO/MASINA**

**MATAUPU**

**TUSI FAITAU**

- |                     |  |                     |
|---------------------|--|---------------------|
| 1. Aukuso 06, 2023  | <b>“O, o le Perofetaga lena”</b><br>(Oh! That was a prophecy)  | Salamo 22: 1-18     |
| 2. Aukuso 13, 2023  | <b>“Sina toe moe itiiti, Tautulimoe”</b><br>(Little more sleep, slumper)                                   | Fa'ataoto 24: 30-34 |
| 3. Aukuso 20,2023   | <b>“Fa'anoanoa fa'a-le-Atua”</b><br>(Godly sorrow)   | 2Korinoto 7:2-16    |
| 4. Aukuso 27, 2023  | <b>“SUEGA MUAMUA”</b>  |                     |
| 5. Setema 03, 2023  | <b>“Loto maulalo ma le Salamo”</b><br>(Humility and Repentance)  | 1Tupu 21: 20-29     |
| 6. Setema 10, 2023  | <b>“O le fa'amutaina o fa'amoemoega”</b><br>(Upending of Expectation)                                      | Mataio 24: 1-14     |
| 7. Setema 17, 2023  | <b>“O uiga Lu'itau”</b><br>(Pressure points)   | Iakopo 1: 1-12      |
| 8. Setema 24, 2023  | <b>“SUEGA LONA LUA”</b>  |                     |
| 9. Oketopa          | <b>TAPENAGA MA MALOLOGA O LE ASO SA LOTU TAMAITI</b>   |                     |
| 10. Novema 05, 2023 | <b>“E tauau ina itiiti a'u”</b><br>(I must decrease)   | Ioane 3: 28-31      |
| 11. Novema 12, 2023 | <b>“O a'u lenei, ia faia lea”</b><br>(Here Iam, let it be)   | Luka 1: 26-28       |
| 12. Novema 19, 2023 | <b>“I tulu'iga o le lalolagi”</b><br>(To the end of the earth)   | Galuega 1: 1-11     |
| 13. Novema 26, 2023 | <b>“SUEGA LONA TOLU”</b>   |                     |
| 14. Tesema 03, 2023 | <b>“E fa'aoga e le Atua so'o se tagata e folafola lana upu”</b><br>(God can use anyone to preach his word) | Efeso 3: 7-13       |
| 15. Tesema 10, 2023 | <b>“O le ala filemu”</b><br>(The way of peace)   | Isaia 35: 1-10      |
| 16. Tesema 17, 2023 | <b>“SUEGA FA'AI'U O LE TAUSAGA”</b>  |                     |

**MANUIA LE TU'UAGA, MANUIA FOI LE KERISIMASI MA LE TAUSAGA FOU.**

## VASEGA MATUTUA – AUKUSO – TESEMA 2023

**ASO SA AUKUSO 06, 2023**

**MATAUPU 1: “O, O LE PEROFETAGA LENA”** Oh! That was a prophecy

**TUSI FAITAU:** Salamo 22: 1-18

**SINI:** Ia a'oa'oina tamaiti, i le taua o le perofetaga mo le tagata mafatia o lo'o fia maua se lavea'i ma le taua o le ola tatalo.

**FESOASOANI MO FAIAOGA:**

E ofo alofa ma fa'afelioa'i atu foi i o outou mamalu fa'alupe, i a outou susuga i Faiaoga Aso Sa i le amataga foi o galuega o lenei afa mulimuli o le tausaga ua amata. Malo le folau, talitonu i le alofa ma le agalelei o le Atua, o lo'o maua pea lo outou soifua manuia i lana tausiga i lo tatou ola. O le tatalo lava, ia foa'i pea e le Atua lo outou malosi aua le fa'atinoina o lo tatou valaauina. O le fa'amalosi lava, ina ia tatou galulue fa'atasi pea aua le tapu'eina o le ola fa'aleagaga o fanau, ona ua le toe faigofie nei aso. Ia tautuana, ina ia lava pea lo outou taimi mo le tusi faitau ua tu'uina atu, fa'atasi ai ma le fesoasoani ua saunia. Ia manuia tele le tapenaga mo le mataupu.

**SINA FA'ASOA MO LE MATAUPU:**

O le tatou mataupu o lenei taeao e tusa ai ma le tusi faitau, o lo'o aumai o se perofetaga mo se tagata po'o ni tagata o lo'o puapuagatia ma mafatia o lo'o fia maua se lavea'iina. A o'o ina tutupu faigata ma feagai tatou ma tiga ogaoga o le tatou savaliga, ona fa'ato'a vave lea ona manatua le Atua. A'o isi taimi uma o le olaga, na'o le tafili saunoa lava i le malosi ma le tele o le tamaoiga, ae galo se fa'afetai e fa'afoi i le Atua. E pei lava o le fuaitau a le atunu'u, “E mu loa le lima, ona tapa loa lea i le i'ofi”, e fa'apea le ata o lo'o aumai e le tusi o Salamo sa tatou faitauina.

Afai o le Salamo a Tavita, o lona uiga o lagona mafatia ua o'o ia te ia ma lona ola valaauina mai le Atua. O Tavita sa filifilia e le Atua e fai ma tupu o Isaraelu, na iloga lona tula'i mai i lona vaitau e ala i le ta'ita'iga o le nu'u o le Atua. E tele mea lelei na ia faia e pei ona molimauina e le Tusi Paia, ae tele foi ona sasi ma ana mea sese sa o'o i ai lana taumafaiga. O uiga lava ia ma le gasologa o le olaga o le tagata, po'o le a lava le tele o mea lelei na te faia ma le maualuga o tulaga tofi e o'o i ai, e le mafai lava ona 'alofia fa'afitauli e tutupu ai. A o le mea taua i le tagata, ia iloa ona fa'amaulalo lona loto ma lagona le salamo e saili ai i le Atua mo se lavea'i e tusa ma lona sese.

A tatou va'ava'ai i upu o le Salamo sa tatou faitauina, o upu a le tagata ua salamo a'o le tagi a le tagata ua fememea'i ma atuatuva'e le loto, ae o lo'o atagia ai foi ma lona agaga fa'afetai i le Atua. E faigofie ona tatou fa'apea, o le tatalo a Tavita po'o le tatalo a le tagata puapuagatia. O lo'o amata lava ana upu, 'Lo'u Atua e, lo'u Atua e, se a le mea ua e tu'ulafoa'i mai ai ia te a'u'. Ua sola manatu ma ua o'otia lagona, ua toe to manatu ifo ae ua le aoga ua masa'a le ipu vai. O lagona o le tagata ua toe sa'i lava ia ia te ia e tusa ma lona sese, ma ua ia fa'apea ifo ane ai, pei ua le fa'afofoga mai ea le Atua ia te a'u e tusa ma lo'u valaau atu.

E fa'apea foi tatou tamaiti, e le sologa lelei pea alumaga o le olaga, o taimi ua lelei o taimi foi ua masei. Ae o le mea taua e pei ona tatou maua i le tatou mataupu, ia i ai se perofetaga i o tatou olaga e pei ona tupu ia Tavita. E tofu tatou ma mea e valaauina i ai e le Atua i le lumana'i, ae aua ne'i galo, e fa'aosoosoina pea i tatou i le tele o fa'afitauli o le olaga nei. A ia tatou tumau pea i le Atua e ala i le tatalo ma le loto fa'atuatua, e lavea'iina mai ai tatou i fa'aosoosoga o le nei olaga. A lagona le vaivai ma le fa'avaivai, tulivae i le Atua i le tatalo e maua ai lo tatou fesoasoani.

**GALUEGA FA'ATINO:** *Fa'atumu avanoa o fuaiupu mai le Tusi Paia ua tu'uina atu. (siosiomia,*

*Vasana, povi poa, sasa'aina, pulu, manava, gutu, leona, suavai, fa'amamaga, manu, ua see ou ivi uma, vagavagai, tietie, A o oe, e paia oe)*

1. Ua \_\_\_\_\_ o latou \_\_\_\_\_ ia te a'u, e pei o le \_\_\_\_\_ ua saei \_\_\_\_\_, ma ua tagi.
2. Ua \_\_\_\_\_ a'u e pei o le suavai, \_\_\_\_\_; o lo'u loto ua pei o le \_\_\_\_\_, ua liu \_\_\_\_\_ i totonu o lo'u \_\_\_\_\_.
3. Ua \_\_\_\_\_ a'u e \_\_\_\_\_ e tele; o e malolosi i \_\_\_\_\_ ua \_\_\_\_\_ mai ia te a'u.
4. \_\_\_\_\_, \_\_\_\_\_; o lo'o e \_\_\_\_\_ i viiga a Isaraelu.

#### **A'OA'OGA:**

1. Ia aua ne'i taumamao ma le ola tatalo i le Atua, pe a o'o mai faigata o le olaga.
2. O le Atua e maua ai lo tatou lavea'i.
3. Ia tatou iloa ma malamalama i perofetaga e o'o mai.

**PESE:** Fa'alogo o lo'o valaau mai  
Tu'itu'i, na te tatala mai  
Le alofa lea ua to'ulu mai.

Fa'afetai tele mo le galuega sa fitaituga ai i lenei Aso Sa, ia fa'amanuia tele le Atua. Ia tofi se tama e fa'ai'u le vasega i le tatalo.

### ***IA MANUIA LE ASO SA!!***

#### **ASO SA AUKUSO 13, 2023**

**MATAUPU 11: "SINA TOE MOE ITIITI, TAUTULIMOE"** Little more sleep, slumber

**TUSI FAITAU:** Fa'ataoto 24: 30 - 34

**SINI:** Ia a'oa'oina tamaiti ina ia tineia le ola paie ma le fa'atalitali moe, ae ia mataala ma to'aga e fai meaaoga ma feau i le aiga e manuia ai.

#### **FESOASOANI MO FAIAOGA:**

Malo lava le onosa'i i feau ma galuega o le vaiaso sa feagai ai ma outou, fa'afetai ai i le Atua ona o lana ta'ita'iina mana i lo tatou ola. Ia toe fa'amanatu pea i tamaiti le taua o le api ma le peni e fa'aoga i le taimi e fa'amatala ai le mataupu. O le fa'atinoina o le fa'amatalaina o le mataupu e taoto atu lava, o lo'o ia outou susuga meaalofa o le galuega, ma ia lava lou taimi e su'esu'e ai. Ia manuia le tapenaga.

#### **FESOASOANI MO LE MATAUPU:**

O le tatou mataupu o lenei aso, 'Sina toe moe itiiti, Tautulimoe'. O lo'o aumai e le potu i le tatou tusi faitau le uiga o le tatou mataupu. O vaivaiga masani ia o le tagata, e fa'atu'utu'u lava i le vaivai ma le matamoe i le tele o taimi. A o le i'uga la o le tagata ola paie, e ola falolo ma ola fiaai, e le taunu'u manuia ana taumafaiga uma, aisea? Aua foi o le tele lava o lona taimi e fa'aalu i le moe ma fa'atalitali se'i toe itiiti ona fai lea o sina galuega, ae uma ifo lava le aso e leai lava se mea o faia.

E le fiafia le Atua i le tagata tautulimoe ma paie, o le Tusi Paia atoa, o lo'o fa'amatala ai tala o le tatou Atua, o le Atua galue e le nofonofo pe matamoe. O le ala lena e finagalo ai le Atua ia ola galue le tagata na ia faia i lona fa'atusa, ina ia foliga ia te ia. O le tagata to'aga ma ola galue, e fa'amanuia i ai le Atua i lona olaga. E leai lava se mea e maua ma se filemu, a le afu le muauulu ma e fa'amaoni e fai au meaaoga, e le mafai ona e selesese i manuia mai le Atua. O le tagata foi e potu, e ola tapenapena ma sauniuni mo taimi o faigata ma puapuaga e o'o mai o le olaga.

O le uiga lena o upu a le potō e pei ona fa'amatala mai e le tatou tusi faitau o lenei aso, 'aia tatou te fa'apea ifo, se'i toeitiiti ona ou alu lea e fai sina a'u feau, se'i toeitiiti ona fai lea o sa'u meaaoga. Aua o le i'uga o le ituaiga mafauaoga lea, o le leai o se mea e faia, a'o lagona ia, o isi ia fa'aosoosoga a le fili e taumafai pea ina ia fa'avaivai lo tatou ola taumafai, e tele lava ina manumalo ia'i tatou i le tele o taimi. A'o lea ua fa'amanatu mai e le potō, 'aia ne'i manumalo le ola fa'atu'utu'u ma le matamoe i o tatou olaga, 'aia foi ne'i o tatou fa'atalitali se'i fai i se isi taimi, leai, o le taimi nei lava tatou te galulue ai, aua tatou te leiloa luma atu na'o le Atua na te silafia mea uma e aga'i i ai o tatou olaga. Aua le matamoe ma tatou fa'apea ifo, se'i toeitiiti sina moe, ae ia to'aga e fai mea aoga ma finau mo lou lumana'i manuia.

### **GALUEGA FA'ATINO: Taliga fesili**

1. O ai o lo'o fa'ataatai i ai upu a le potō e pei ona aumai e le tusi faitau?  
Tali: O lo'o fa'ataatai i le tagata ola fa'atu'utu'u.
2. O le a le uiga o le upu laau tuitui?  
Tali: E fa'ataatai i laau leaga latou te fa'aleagaina laau lelei.
3. O le a le i'uga o le tagata paie ma fa'apea ifo se'i toe itiiti sina moe, se'i toe itiiti se matamoe?  
Tali: O le mativa ma le le tagolima.
4. O se mea lelei le tagata ola paie tamaiti?  
Tali: E leai.
5. O le a la se a'oa'oga taua ua e maua mai i le mataupu sa fa'amatalaina?

### **A'OA'OGA:**

1. Aua le ola paie ma fa'atu'utu'u se'i o'o i se isi taimi.
2. Ia to'aga e saili le potō ma 'ia maua le atamai mai le Atua.
3. Ia avea oe ma fa'ata'ita'iga lelei mo isi tagata.

**PESE:** A 'ia e tau malosī, tete'e i le fili  
'Aua lava ne'i e fa'avaivai.  
A 'ia e tau ma le Alii o 'au  
E aoga e tutumau.

***IA MANUIA TELE LE ASO SA!!***

**ASO SA AUKUSO 20, 2023**

**MATAUPU 111: "FA'ANOANOAGA FA'A-LE-ATUA"** Godly sorrow

**TUSI FAITAU:** 2Korinoto 7:2-16

**SINI:** Ia malamalama le vasega, o le fa'anoanoaga fa'a-le-Atua, e tupu ina ua agasala le tagata.

### **FESOASOANI MO FAIAOGA:**

Fa'afeiloa'i atu foi i lenei aso fou ua tatou maua i le alofa ma le agalelei o le Atua i lo outou soifua ma lo tatou ola. Ua fa'amalo le galulue fa'afetai le pale i feau ma galuega o lo'o feagai ai pea ma outou i aso ta'itasi. Ae o le tagi lava a le pu mate ina ia sologa manuia la tatou pitolaau tau'ave, ae a le

manuia o fanau mo le lumana'i ma lo latou ola fa'aleagaga. Ia lava pea le taimi e fa'aavanoa mo le faitauina o le tusi faitau o le mataupu ua tu'uina atu. Ia manuia le tapenaga.

### **SINA FA'ASOA MO LE MATAUPU:**

A o'o ina tutupu fa'afitauli i le soifua ma le ola o le tagata, o lona uiga ua i ai le sasi i le va nonofo ai. E pei lava foi ona i ai i le amataga o le foafoaga ia Atamu ma Eva, lea na agasala ai le ulua'i tagata, atonu na fa'anoanoa le Atua ona o le mea ua tupu.

E fa'apena foi le agaga o le mataupu i le fa'anoanoa ai o le Atua e pei ona molimau ai le aposetolo o Paulo i lana tusi. Lea e fai mai le fuaiupu e 10, "Aua o le tiga e tusa i le Atua e tupu ai le salamo e o'o i le fa'aolataga e le toe sa'afi ai; a o le tiga fa'alelalolagi e tupu ai le oti." Mafua ona tupu le fa'anoanoa o le Atua ona o amio a le tagata. A o le agasala foi lona, a le mafai ona salamo ma fultua le tagata mai le leaga, e le mafai lava ona fa'aolaina ma e le maua ai lava se fiafia.

Fai mai Paulo, a o le tiga fa'alelalolagi e tupu ai le oti, o lona uiga, o mea uma lava e tutupu i le lalolagi o mea e faia i lalo nei, o mea e pala. O lona i'uga o le oti, a o mea fa'alelalolagi nei ua fai ma ala ua nanau tele ai le loto o le tagata, ona aveva lea ma fa'anoanoaga sili i le Atua. E fa'apena le lagona o le Atua o i ai i le tusi atu o le aposetolo o Paulo i Korinito. Aemaise ai o le tulaga o i ai a'oa'oga e fa'atatau ia Iesu Keriso. Peita'i e le'i mapu le aposetolo e taugologolo atu, lea lava na fa'aalia e ala i lana molimau i le o'o mai o Tito ma fa'amafanafana ia i latou. O se lagona fa'atupu malosi i le tagata fa'atuatua e ui i le agasala.

E le gata i lea, o le fiafia o le aposetolo o Paulo ina ua mafai ona fa'amafanafanaina loto o tagata mafatia. Aemaise o le tala'iga o le loto salamo, ina ia mafai ona maua uma e tagata o i Korinito. Aua pau lea o le auala e mafai ai ona liliu le fa'anoanoa o le Atua, o le tagata ua salamo moni ma foi atu I le Atua. O le ala lea na mitamita ai Paulo ona o Tito ma lana galuega na faia i Korinito, lea ua saga fa'amausali ai lava le fa'atuatua o tagata. Fai mai le fuaiupu e 13, "O le mea lea na fa'amafanafanaina ai i matou i le fa'amafanafanain a o outou; ia matua tele lo matou olioli; ua atili ai ona o le olioli o Tito, aua sa to'afilemu lona loto ia te outou uma."

O le uiga foi lea o le tatou mataupu tamaiti i lenei aso, fa'anoanoaga fa'a-le-Atua. O le fa'anoanoa o le Atua, ina ua tupu le agasala i le va nonofo ai ma le tagata. Fa'anoanoa ina ua sese le fa'atinoga a le tagata, ma ua le savali i le ala e ao ona mulimuli i ai. Ae le tumau ai pea le tiga o le Atua, e i ai lava le taimi e fa'amafanafana mai ai ma pa'i mai lona Agaga ina ua maua e le tagata le loto salamo moni ma le fa'atuatua moni i le Atua.

### **GALUEGA FA'ATINO: *Fa'amatala uiga o upu o lo'o ta'ua I lalo***

Salamo, puapuagatia, fa'amafanafana, olioli, fa'atiga, fa'alelalolagi, fa'aolataga, agaleaga, fa'atuatua, mitamita, to'afilemu.

### **A'OA'OGA:**

1. Ia maua le loto salamo moni I le Atua.
2. E alofa le Atua ia I tatou I taimi uma.
3. O le fa'anoanoa o le Atua e mafai ona liua pe a talitonu ma fa'atuatua moni ia te Ia.

**PESE:** Fai mea tonu o mea lelei (Pese ma Viiga)

***IA MANUIA TELE LE ASO SA!!***

## **ASO SA AUKUSO 27, 2023**

### **MATAUPU 1V: SUEGA MUAMUA**

**TUSI FAITAU:** Salamo 22: 1-18, Faataoto 24: 30-34, 11Korinito 7:2-16

**SINI:** Ina ia manatua pea e tamaiti tala o le Tusi Paia o lo'o fa'amatalaina i mataupu ta'itasi, ma 'ia tuputupu ma olaola i o latou mafaufau, ma ta'ita'iina ai pea o latou olaga.

### **FESOASOANI MO FAIAOGA:**

Ua tatou o'o mai i le Aso Sa mulimuli o lenei foi Masina, malo lava le tauata'i i o outou faiva alofilima fa'a-faiaoga Aso Sa. O le gasologa masani lava o a tatou galuega, e taoto atu lava le fa'atinoga o tatou suega o Masina ta'itasi e pei ona masani ai. A'o le fa'amanatu, e ao lava ona fa'ataunu'u a tatou fa'amanatu. Ia manuia le tapenaga mo le suega.

### **Fesili:**

1. O a ni lagona o lo'o aumai e le tusi o Salamo e pei ona fa'amatalaina i le mataupu?  
Tali: O lagona o le atuatuva'e ma le mafatia o lo'o fia maua se lavea'i.
2. Fa'amata o le a se vaaiga ua tatou masani ai o lo'o atagia mai i le Salamo?  
Tali: O lo'o atagia mai o ni upu o se tatalo, e le gata o lo'o fia maua se lavea'i ae o lo'o i ai foi le agaga fa'afetai.
3. Aisea e tatau ai ona tatalo le tagata i le Atua?  
Tali: E le gata e fa'afetai mo ana fa'amanuiaga, ae tatau foi ona tatou fa'ato'ese e tusa ma o tatou agasala, ma tatalo ina ia fesoasoani mai i lo tatou vaivai.
4. O a la ni a'oa'oga manaia sa maua mai i le mataupu sa fa'amatala i le tusi o Salamo? (tu'u le avanoa e tali mai ai tamaiti)
5. I le tusi o Fa'ataoto sa fa'amatalaina, o le a le mea na vaaia e le poto i le fanua o le tagata paie?  
Tali: Ua tupu ai laau tuitui ma le pa ma'a ua solo.
6. O le a le taunu'uga e taunu'u i ai le tagata paie ma le matamoe?  
Tali: O le mativa ma le le tagolima.
7. Ina ua vaaia le tulaga e pei ona ta'ua e le poto, o le a se mea sa a'oa'oina ai o ia?  
Tali: Sa a'oa'oina, e leaga le fa'a'apea ifo, se'i toe itiiti sina moe, se'i toe itiiti se matamoe, toe itiiti se piilima e taoto ai.
8. O le a le mea e mafai ai ona liliu le fa'anoanoa o le Atua e tusa ai ma le molimau a Paulo?  
Tali: Ia salamo le tagata ma foi atu i le Atua.
9. O ai sa fesoasoani ia Paulo ma lana galuega fa'amafanafana i Korinito?  
Tali: O Tito.
10. Aisea na mitamita ai Paulo ona o Tito?  
Tali: Ona o ia sa matua fa'amausali ai le fa'atuatua o tagata Korinito.

Fa'afetai mo le saunia lelei o le suega po'o le fa'amanatu mo le vasega, ia saunia se pese ma fai se tatalo e fa'auma ai le vasega.

## **ASO SA SETEMA 03, 2023 (Aso Sa Talalelei)**

**MATAUPU V: “LOTOMAUHALO MA LE SALAMO”** Humility and Repentance.

**TUSI FAITAU:** 1Tupu 21: 20-29

**SINI:** Ia malamalama tamaiti i uiga o upu o lo'o i le mataupu aemaise o le feso'ota'iga ma le tusi faitau.

### **FESOASOANI MO FAIAOGA:**

O le Aso Sa lenei o lo'o fa'amanatuina ai le o'o mai o le Talalelei i Samoa, ua matua le Talalelei i lo tatou atunu'u. O le ala foi lea o se fa'amanatu aua ua tatou masani i tausaga ta'itasi, a 'ia aua ne'i avea lea tulaga ma ala tatou te manatu mama ai i le fa'amatalaina o le mataupu. E taua le a'oa'oina pea o fanau ina ia manatua pea i o latou mafaufau lea vaega taua o le talafa'asolopito a le tatou Ekalesia.

### **FESOASOANI MO LE MATAUPU:**

O le fa'amaualuga ma le mana'o tele, e tupu ai le loto ita ma o'o atu ai i le fevaevaea'i ma le faia o auala leaga e fa'aumatia ai le ola o le isi tagata. A'o le lotomaulalo, e mafai ona ia pulea lona loto ma tausia le filemu mo le nofo fealofani o tagata. O le salamo, o le feau lea o le talalelei na afio mai ai Iesu i le lalolagi, ina ia maua e tagata uma le salamo ma toe foi i le Atua.

O le tatou mataupu i lenei taeao, '**Lotomaulalo ma le Salamo**', o le tala sa tatou faitauina, o le mana'o o Aapo i le tovine a Napota. O le tala ua tatou masani ma fa'alogos'o'o i ai, ina ua va'ava'ai atu Aapo ua matagofie mai le tovine a Napota, ona tupu ifo loa lea o lona manatu, o le a ia fa'atauina ma ia. Peita'i, e le'i talia e Napota ona o le fanua o le tofi o ona Tama. Ua avea le naunau atu o Aapo i le tovine a Napota, ma ala ua fai ai e Iesepela lona to'alua le auala leaga ina ia fasiotia ai Napota se'i tali ai le mana'o o Aapo.

Na taunu'u lava ma maua e Aapo le tovine a Napota e pei ona ia mana'o ai, ae le o se auala lelei na ia mauaina ai. O le mea ia iloa, e silafia e le Atua mea uma, na fetalai le Atua ia Elia ina ia ta'u ia Aapo le leaga o lana mea na fai ia Napota, o le mea lea e fa'ao'o foi e le Atua le leaga ia te oe. Ina ua fa'alogos'o'o i ai Aapo i upu na fai atu ai Elia. Na matua lagona e Aapo ma ia fa'amaualalo ai i luma o le Atua.

Ona toe fetalai lea o le Atua ia Elia, 'e te iloa ea ua fa'amaualalo Aapo i o'u luma, o le mea lea ou te le fa'ao'o ai le leaga i lana nofoa'iga, a o le nofoa'iga a lona atalii ou te fa'ao'o ai le leaga i lona aiga.'

Ioe tamaiti, o le lotomaulalo o le 'au'upega sili lea mo tatou, po'o a lava upu ma tala e fetogi mai ai le lalolagi ina ia fa'aumatia ai tatou. Ia tatou tali atu lava i le lotomaulalo ma le filemu, ae 'aua tatou te tau masui atu i ai e pei foi ona faia e Napota. A'o le finagalo lea o le Atua mo tatou, ia tatou maua le lotomaulalo ma le loto fa'amagalos'o'o atu. Afai foi tatou te faia le leaga e pei ona faia e Aapo ma lana ava o Iesepela, ia tatou iloa ona fa'amaualalo i luma o le Atua ma le loto Salamo fa'amaoni.

O le feau lea o lenei Aso Sa o le Talalelei mo tatou le fanau, o Iesu na ui mai i le ala o le lotomaulalo, na ia onosa'ia tiga ma faigata aemaise o le tauemu o tagata. O lona finagalo, ia tatou foi atu i le Atua ma o tatou loto ua Salamo fa'amaoni ia te Ia.

### **GALUEGA FA'ATINO: Taliga Fesili**

1. O ai le igoa o le to'alua o Aapo?  
Tali: O Iesepela
2. Aisea na fetogi ai Napota i ma'a ma oti ai?  
Tali: Ona o le mana'o o Aapo i le tovine a Napota.



3. Na talia e Napota le mana'o o Aapo?

Tali: E leai

4. O ai na fetalai i ai le Atua ina ia alu e fa'afetaia'i ia Aapo ma ta'u atu i ai le feau?

Tali: O Elia

### **A'OA'OGA:**

1. Aua le mana'o tele
2. Ia maua le lotomaulalo ma le loto fa'amagalo.
3. Ia talia le feau o le Salamo e pei ona aumai e Iesu mo i tatou.

**PESE:** 136 Pese ma Viiga

## ***IA MANUIA TELE LE ASO SA!!***

### **ASO SA SETEMA 10, 2023**

**MATAUPU VI: “O LE FA'AMUTAINA O FA'AMOEMOEGA”** (The upending of expectations)

**TUSI FAITAU:** Mataio 24:1-14

**SINI:** Ia malamalama le vasega i le taua o le ola fou o lo'o ia Iesu Keriso, ina ua talia ma talitonu fa'amaoni.

### **FESOASOANI MO FAIAOGA:**

Fa'atalofa atu malo le soifua manuia i lenei aso fou ua tatou maua i le alofa ma le agalelei o le Atua. Fa'afetai foi i lo outou soifua galulue e tusa o la outou pitolaau tauave i la tatou galuega, malo lava le onosa'i fa'afetai le fa'atoatoa mo le Atua ma lona finagalo. O le Atua lava e ona tofiga o Ia foi na te toe fa'amanuia atu e tusa o lo outou tautiga i lana galuega. O le fa'amanatu masani lava, ina ia fa'avagavaga pea lou taimi e va'ava'ai ai i la tatou tusi faitau. Ia manuia le tapenaga mo le mataupu.

### **SINA FA'ASOA MO LE MATAUPU:**

O le mataupu o lenei Aso Sa, ua talafeauga ma le lavelave o le galuega tala'i sa feagai ma le Alii Fa'aola. E vaaia pea le le talia e Iutaia o Iesu ma lana feau momoli atu o le Malo o le lagi, ona o le ta mau pea i talitonuga tuai. O le tala a Mataio le Iutaia mo ona lava tagata le talitonu, e fai o le gagau gata o latou loto a o le pogisa pea o la latou vaai po'o ai Iesu.

O le vaega lenei o le lauga a Iesu i le mauga o Olive. Ina ua ulufafu mai le malumalu, na fa'asee teisi atu ai i le tuasivi o le mauga o Olive e lata ane lava i le aai o Ierusalem ma mafuta ai ma lona au so'o, fa'atasi ma e na mulimuli atu ia te Ia ina ua latou talitonu i ana a'oa'oga.

O le malumalu, o le ogatotonu lea o le talitonuga ma tapua'iga a tagata Iutaia. E mafuta ai ma fa'anomanu ai i le Atua. O le ulua'i malumalu na faia e le tupu o Solomona na fa'aleagaina foi i le taimi o sauaga a Papelonia i le 586 TLM, a'o lea foi ua toe valoi'a lona fa'atafunaina. A fua i taimi o Iesu, e foliga mai o lo'o fa'aaauu pea le faia pea o ni galuega fa'aleleia ma le so'oso'oina o le malumalu talu mai le taimi o le tupu o Kuresa, se'ia o'o i le taimi o le tupu o Herota le sili, le vaitaimi tonu lea o le galuega tala'i a Iesu.

O le fa'aleagaina o le malumalu, a fa'afaigofie le fetalaiga a Iesu, e le toe iloa se tulaga o se malumalu ua matua fa'aleagaina. O le ata o le afio ese o le Atua ma lona nu'u, ona ua le taliaina o Ia, a ua atua i talitonuga tuai ma fa'aaauu pea lo latou liliu ese ma Ia. O le finagalo foi o Iesu o lo'o taumafai e fa'aילו atu i lona au so'o, afai e fa'atuatua mai ia te Ia, e tusa lava pe fa'atafunaina le

malumalu, e le afaina, o Ia o le malumalu fou. E le toe mana'omia se ulufale i le malumalu e mafuta ai i le Atua, e afio fa'atasi o Ia ma tagata uma e fa'atuatua ma talitonu i lona afio mai. E le na o le malumalu foi na fetalai ai Iesu i lana lauga lea. E i ai foi ma fa'aaliga o mea o le a tutupu i le lumana'i ua latalata mai. O lea lauga, e foliga mai ai o se lapataiga, a o se tu'ufagufagu foi ua tu'uina atu mo le au so'o ma tagata Iutaia uma, mo le iuga o aso ua taulata mai.

O le finagalo o Iesu, o le fa'amalumalu mai o le pulega le taupulea a Roma, o le a matua olopalaina ma tofotofoina ai le fa'atuatua o ona so'o, ma e maumau ai lava le soifua. E ao ina mautu ma tutumau le fa'atuatua o lona au so'o ma tagata fa'atuatua uma. E fa'aseseina foi lo latou fa'atuatua aua o le a i ai ma perofeta pepelo. E o'o foi i tagata sa talitonu ia te Ia, o le a mamulu lo latou fa'atuatua i fa'atosina a le Malo o Roma ma ana auala e taumafai e titina le talitonuga fou lea.

O le le taliaina o Ia e tagata Iutaia ma lana feau o le malo o le lagi, o se fa'anoanoaga tele i le finagalo o Iesu. Aua foi, ua avea le manatu faualuga o le to'atele o tagata, ua le mafai ai ona pupula o latou mata fa'alefa'atuatua, o Ia lava o le Mesia na valoi'a. O lona malo foi e le o se malo fa'alelalolagi, a o le malo o le lagi. Na o le tagata lava la e fa'atuatua ma talitonu ma talia o Ia, e saofaga i le malo o le lagi, tusa lava pe feagai ma fa'afitauli.

### **GALUEGA FA'ATINO: Fa'asoa manatu**

**AUTU: “O se ua maua Iesu, o le tagata fou lea”**

1. O le “Talanoa” o se tasi lenei o metotia (method) ua fa'aogaina e le lalolagi, e fa'asoa ai i ni mataupu mo le sailia o ni manatu ma ni mafaufauga lelei ma aoga, mo le fa'aleleia o so'o se mea.
2. Ia fa'aogaina lea auala, e fa'asoa ai lau susuga i le Faiaoga ma le vasega, e uiga i le autu ua tu'uina atu.

### **A'OA'OGA:**

1. Taofi talitonuga tuai ae talia Iesu e ola ai.
2. Tumau le fa'atuatua i le Alii pe a o'o mai faigata o le ola.
3. Aua le fa'aseseina oe e talaiga le fa'avaea.

Fa'afetai atu lava mo le galuega o lenei Aso Sa, ia saili ane se pese mo le mataupu ma fa'ai'u le vasega i le tatalo.

***IA MANUIA LE ASO SA!!***

### **ASO SA SETEMA 17, 2023**

**MATAUPU VIII: “O UIGA LU'ITAU” (Pressure points)**

**TUSI FAITAU:** Iakopo 1:1-12

**SINI:** Ia a'oa'oina tamaiti ia latou iloa, o faigata, o uiga ese'ese na o le ola, e lu'itauina ai le onosa'i, ma fa'atumauina ai pea le lagona olioli.

### **FESOASOANI MO FAIAOGA:**

Ua tatou o'o mai i le sauni atu o le fanau i lo latou aso fa'apitoa, malo lava le fa'apalepale ma le onosa'i e tusa o le fa'atinoina o a outou faiva alofilima. Talitonu foi, ua talafeagai lelei le mataupu o lenei aso ma lo outou soifua galulue ai, aemaise lava o le tele o lu'itau e feagai pea ma lo tatou ola i lea aso ma lea aso. Ae ui i lea, e fa'afetai ma vivi'i fai a'e pea o tatou loto i le Atua, ona o lana tausiga i lo outou soifua ma lo tatou ola. E ao ai lava ona tatou fa'amaoni e fa'atino so'o se tofiga ua

valaauina i ai tatou e le Atua tatou te galulue ai.

### **SINA FESOASOANI MO LE MATAUPU:**

O Iakopo le sa tusia lenei tusi, o ia o le uso o lo tatou Alii o Iesu, ma o ia foi sa fai ma ta'ita'i o le lotu Ierusalem, po'o le tausaga e 40—50 (AD-After Death) tausaga o le Alii (T.A), ae na fasiotia i le 62 (T.A). O le tusi e mo tagata Iutaia ma Kerisiano o mulimuli ia Iesu, a'o aumau i nu'u ese, e aofia ai ma tatou.

O lo'o ta'utino mai lava e le Aposetolo, o le olaga e faigata i na aso. O le tele o faigata o feagai ma tagata o le Alii, o le anoanoa'i foi lena o fa'aosoosoga, ma tofotofoga e tofotofoina ai le ola fa'atuatua ma le mulimuli moni ia Iesu. Fai mai Iakopo, o le tagata na te iloa le taua o tofotofoga i lona ola, o le tagata onosa'i moni lena, aua o tofotofoga e iloa ai le tagata onosa'i. O le atoatoa foi o le onosa'i, e iloa ai le tagata matua, e le o toe mativa i se mea mai le Alii. O faigata masani lava e pei foi o nei aso, e i ai le mativa, o fa'aiuga sese, o le ola taotaomia aemaise le ola sauaina e pei ona i ai i la aso.

O le uiga la o le manatu o Iakopo pe a tu'u sa'o, 'aua le fefe', aua o faigata, e mafai ona avea ma ala savali o le ola au-i-luma. O tofotofoga foi, o se auala lea ua fa'amaonia, le saunia lelei ai o le tagata mo lu'itau, o i'ina e fa'afouina ai ma fa'aalia ai lona malosi i totonu. O le avea lea o le onosa'i ma taulaiga muamua o le ola fa'atuatua, o le saunia lava lea mo so'o se lu'itau, mo se taimi umi e tauave ai fita ma tiga o le ola, ma ola ai foi ma le potu ma le fa'atuatua. Vagana le tagata ua leai se potu o i ai. O le potu, o le olaga tatau ma fa'aaloalo i le Atua, ona tatalo lea ia maua. O le tatalo foi, o le manaoga e fai i le lotu talitonu fa'amaoni, e leai se masalosalovale o i ai. Aua e valaau loa i le Atua ma le fa'alotolotolua, ona leai lava lea o se mea e maua e lea tagata.

O le feau fa'amalosi lea mo e mulimuli ia Iesu. Ia taula'i i le avea ma tagata matua i le fa'atuatua i le Atua, e ala i le onosai'a o faigata, talu le alofa fa'amaoni ia te ia. Ua tatou iloa le anoanoa'i o faigata na fetaia'i ma le Alii, ae sa onosa'i lava ma le talitonu, o lo'o soifua le Atua lona Tama, le alofa tunoa uma, tatou te le matitiva ai i se mea e tasi. O i latou uma foi e onosa'i sei'a o'o i le i'uga, latou te maua le tau ua folafolaina mai, “O le pale lea o le ola.”

### **GALUEGA FA'ATINO: Taliga fesili**

1. O ai uso o le tusitala, lea e tusi i ai e pei ona ta'ua ai i le fuaiupu e 2?  
Tali: O uso, o lo'o fa'atatau i Iutaia ma Kerisiano uma o salalau i nu'u ese.
2. O le a lea mea o le onosa'i?  
Tali: O le onosa'i, o le lavatia tatali faigata.
3. O le a tonu le taimi e iloa ai le onosa'i?  
Tali: O le taimi o tofotofoga i mea faigata o le ola.
4. O ai le tagata lea e ta'ua i le tusi faitau, e leai ma se mea na te maua mai le Alii?  
Tali: O le tagata e mana'o i se mea mai le Alii, ae fa'alotolotolua le lotu ia te Ia.
5. O le a le uiga o le pale, lea e maua e le tagata fa'atuatua e pei ona ta'ua i le fuaiupu e 12?  
Tali: O le pale, o le ola lava lea e fa'avavau.

### **A'OA'OGA:**

1. O le fa'atuatua e tofotofoina pea.
2. E tupu le onosa'i i le fa'atuatua.

3. 'Aua e te masalosalo i le Alii.

**PESE:** 174 Ia tausinio ma taumafai nei.

### ***IA MANUIA TELE LE ASO SA!!***

#### **ASO SA SETEMA 24, 2023**

#### **MATAUPU: “SUEGA LONA LUA”**

**SINI:** Ia tumau pea ma manatua e tamaiti tala o le Tusi Paia o lo'o fa'amatalaina i mataupu ta'itasi, ia le gata o le fa'alogo, a 'ia maitau ma ola ai.

#### **FESOASOANI MO FAIAOGA:**

Ua tatou o'o mai foi i le Aso Sa mulimuli o lenei Masina, malo lava le sa'iliili fa'afetai le galulue, ua toe nei o se aga ona fa'ataunu'u lea o le lotu tamaiti. O le mea lea ia tatou fa'amalolosi ma ia maua pea lo outou onosa'i ma loto tetele i le galuega. Ia tautuana ma outou susuga le faiga o tatou suega ina ia fa'ataunu'u pea, ma 'ia saunia ni meaalofo ma nai tamaiti e fa'afiafia ai i lo latou aso.

#### **FESILI MA O LATOU TALI:**

1. O ai le igoa o le to'alua o Aapo?

Tali: O Iesepela

2. Aisea na fai ai e Iesepela le auala leaga ina ia fasiotia ai Napota?

Tali: Ina ia maua ai e Aapo le tovine a Napota e tali ai lona mana'o.

3. O ai le igoa o le auauna a le Atua na ia ta'u atu le feau ia Aapo?

Tali: O Elia

4. O se auala lelei na maua ai e Aapo le tovine a Napota?

Tali: E leai

5. O le a se feau o le Talalelei o lo'o aumai e le tala ia Aapo?

Tali: O le feau o le Talalelei e pei ona maua ia Aapo, sa fa'amaulalo lona loto ma lagona lona salamo i luma o le Atua.

6. O ai e fa'asino i ai le malumalu fou e pei ona ta'ua e Iesu i lona au so'o?

Tali: O lo'o fa'asino tonu ia Iesu, o ia o le malumalu fou.

7. O le a se feau o lo'o ta'u atu e Iesu i lana lauga e pei ona aumai e Mataio?

Tali: O le fa'amalosi ina ia aua ne'i fa'avaivai, a 'ia tumau le fa'atuatua o le 'au so'o e tusa ma le malosi o puleaga a le malo o Roma.

8. O le a tonu lava lea mea e ta'u o le onosa'i?

Tali: O le onosa'i, o le lavatia lea ona tatali tiga ma faigata e o'o mai.

9. O le a tonu le taimi e iloa ai le onosa'i?

Tali: O le taimi o tofotofoga.

10. O a ni mea lelei sa e maua mai i tala mai le Tusi Paia sa fa'amatalaina i mataupu ta'itasi o

lenei Masina? (fa'amatala mai lava e le tamaitiiti i ona manatu)

E taoto atu lava i lau susuga i le Faiaoga pe fa'aopoopo nisi fesili po'o le fai lava o ni au lava fesili mo le suega. Ae o le mea taua, ia fa'ataunu'u pea a tatou suega fa'amanatu mo le fa'ai'uga o le Masina. Ae saili ane se pese ma saunia se tatalo e fa'auma ai le vasega.

## ***IA MANUIA LE ASO SA!!***

### **OKETOPA: TAPENAGA MA MALOLOGA O LE ASO SA LOTU TAMAITI.**

**ASO SA NOVEMA 05, 2023**

**MATAUPU 1X: "E TAUAU INA ITIITI A'U" (I must decrease)**

**TUSI FAITAU:** Ioane 3: 28-31

**SINI:** Ia malamalama le vasega, e ao ina fa'asilisili Iesu i mea uma tatou te faia, ae ia lagonaina lo tatou fa'atauva'a ma le le atoatoa.

**FESOASOANI MO FAIAOGA:**

Ua mae'a tapenaga o le lotu tamaiti na feagai ma tatou, malo lava le fa'amalolosi i lea foi vaega taua o lo tatou valaauina, talitonu sa tatou maua fa'atasi se feau mai fanau e tusa o a latou fa'atinoga. Ia ae alo ane loa mo le la'asaga mulimuli o le fa'agasologa o la tatou galuega o lenei tausaga. O le autu lava ma le pogai o le fa'amanatu, ia lava tapena le faiaoga mo le fa'amatalaina o mataupu ta'itasi.

**SINA FA'ASOA MO LE MATAUPU:**

O le tatou mataupu o lenei taeao, o se fuaitau o lo'o atagia ai le lagonaina e le tagata o lona fa'atauva'a. E iloa ai le tagata e le fa'amaualuga i ona manatu ma ni ona lagona, e le se'etia gofie foi i ni ona vi'iga, pe mitamita vale i sona tulaga maualuga ua i ai. Ae o se ta'utinoga e iloa ai, e le o sona lava potu ma se malos, ae o le Atua ua afua ai.

O le tusi faitau o le tatou mataupu i lenei taeao, o le ta'utinoga a Ioane le Papatiso, se'i tali atu ai i se finauga a isi ona so'o ma le tasi Iutaia, e uiga i le papatisoga o lo'o fai fo'i e Iesu i Iutaia. Pei e foliga mai, o lo'o taumafai e fa'alotoleagaina Ioane, ona ua i ai fo'i le isi tagata ua ia faia lana galuega o le papatiso atu.

Lea la ua ia ta'utino ai lona fa'atauva'a i lo la va feagai ai ma lona Alii Fa'aola o Iesu. O lo'o iloa lelei e Ioane lona tulaga ma lona valaauina. E le sili atu lava ia i a Iesu. Ua ia aumai ai le ata o se fa'aipoipoga. E le o ia o se tama fa'aipoipo po'o le fa'ato'afaiava, a'o ia o le uo a le fa'ato'afaiava po'o le uo sili. E le o ia e autu ai le galuega; o Iesu lava. O lana lea fa'aeaea ia Iesu. Ua ia manatu ai, ia fa'atuputeleina pea le fa'asilisiliina o Iesu, ae ia itiiti ia. Ua na o ia o se auauna. Lea e iloa i le fuaiupu e 31. Ua ta'utino ai Ioane, o le maliu mai luga, e sili o ia i mea uma, o Iesu lea. A o le mai le lalolagi, e tautala fo'i o ia i mea o le lalolagi, o Ioane lea. O se ta'utinoga, e iloa ai le tagata o lo'o ia lagonaina lona fa'atauva'a i le fa'atinoina o lona valaauina. E le'i fia fa'atautava ia Iesu, ae na taulamua i le fa'amaualugaina o le Suafa o Iesu.

Tamaiti, e lelei Ioane na ia iloa lelei lo la va feagai ai ma Iesu. Ae ana o se isi o tatou, e le mana'o ia itiiti, ae mana'o foi ia sili atu ia. O le feau mo tatou, so'o se mea lelei tatou te faia ma ta'uileia ai tatou, 'aua e te mitamita, ae ia fa'afo'i le fa'afetai i le Atua, aua o Ia na mafua ai. O lou fa'aeaea fo'i lena ia Iesu, ae tumau pea lo tatou fa'atauva'a.

**GALUEGA FA'ATINO: Uiga o Upu ma Fuaitau**

1. fa'ato'afaiava - o lo'o fa'atatau ia Iesu (o le atalii fa'atoa fa'aipoipo)
2. uo a le fa'ato'afaiava - o lo'o fa'atatau ia Ioane. (o le uo sili a le tama fa'aipoipo)
3. molimau - tagata o lo'o fa'amaonia se manatu.

Ia faitau tusi nei ma su'esu'e ai i le ese'esega o le ta'utinoga a Ioane o lo'o fa'amatalaina.

1. Mataio 3:11-12
2. Mareko 1:7-8
3. Luka 3:15-17

#### **A'OA'OGA:**

1. Ia iloa ona fa'afō'i le fa'afetai i le Atua, ona o mea lelei ua ia saunia mo'i tatou.
2. 'Aua le fia vi'ia.
3. Tauga le lagonaina o le fa'atauva'a ma le le atoatoa.
4. Fa'amoemoe i le Atua e manuia ai mea uma tatou te faia.

**PESE:** Pese ma Viiga 74

### ***IA MANUIA TELE LE ASO SA!!***

#### **ASO SA NOVEMA 12, 2023**

**MATAUPU X : “O A'U LENEI, IA FAIA LEA”** (Here I am: let it be)

**TUSI FAITAU:** Luka 1: 26-28

**SINI:** Ia malamalama tamaiti, a valaau le Atua ma fa'aogaina i tatou, ia tatou usiusita'i ma talitōnu i ai.

#### **FESOASOANI MO FAIAOGA:**

Malo lava le galulue fa'afetai foi le onosa'i i feau ma galuega o lo'o feagai ai ma outou, o lo'o fa'agasolo pea la tatou galuega o lenei foi tausaga. Ae le tu'ua ai lava le fa'amanatu atu pea mo le fa'atinoina o le fa'amatalaina o tatou mataupu. E lelei lava ona lava le taimi e tapena ai mo le mataupu o le Aso Sa, ina ia manino ma maua pea e fanau le feau momoli mai e le tusi faitau.

#### **SINA FA'ASOA MO LE MATAUPU:**

E ese'ese fa'aogaina o lo tatou ola e le Atua. O nisi e avea foma'i, o nisi e avea ma tausī aiga, o nisi e avea ma faiaoga, o nisi foi e avea ma faifeau a'o nisi foi e avea ma kovana po'o loa. E ese'ese uma lava, a o le mea taua e ao ona iloa ma malamalama ai tatou, o a tofiga ma valaauina ua fa'aoga i ai e le Atua lo tatou ola, ia o tatou talia ma le agaga fa'afetai; aua o i na o lo'o auala mai ai lo tatou manuia.

E fa'apea se agaga o lo'o atagia mai i le vaega o le evagelia a Luka na o tatou faitauina nei, o lo'o amata lava Luka i le fa'amatalatala mai ai o le fa'asinomaga o Maria. O Maria o le tagata mai i le aai o Kalilaia i Nasareta, o le taupou mai le aiga o Tavita, ua faufautane ia Iosefa.

Na afea o ia e le agelu a le Atua ma fa'apea atu, “Si o'u alofa ia te oe le ua alofaina, ua ia te oe le Alii.” O se saunoga na matua'i fa'atei'a ai Maria, aemaise ai o le fa'atoa ia vaai lea ua asiasi atu se agelu ia te ia ma fa'ailoa atu le mea o le tupu. O le ala lea na ia atuatuva'e ai ma ua tautomanatu pe se a ea le uiga o le mea ua tupu. Masalo ai ona o tatou lea e tupu ai lenei fa'aaliga, ailoga tatou te talia lea ituaiga fa'aaliga.

Peita'i tatou te le tau masina ma le finagalo o le Atua, o le ala lea na fetalai ai le agelu, "Maria e, aua e te fefe; aua ua alofaina mai oe e le Atua, fa'auta foi, o le a to oe, ma e fanauina se tama tane, e te fa'aigoa ia te ia o Iesu. E sili o ia, e te ta'ua foi o le Alo o le Silisili ese; e foa'i atu e le Alii o le Atua ia te ia le nofoaiga a Tavita lona Tama, e fai o ia ma tupu i le aiga o Iakopo e fa'avavau, o lona malo foi e leai sona gata'aga."

O upu e fa'atei'a ai manatu ma lagona o le tagata. A o upu ua lagona ai e Maria lona fa'atauva'a i luma o le Alii, ia faia ia te a'u e tusa ma lau fetalaiga. O lona uiga, e peisea'i o le lagona o Maria, o lo'o fa'ailoa mai ai lona talia o le finagalo o le Atua, e auala mai ia te ia le fa'aolataga o le lalolagi atoa.

O le fa'amanatu foi lea mo tatou le fanau, e i ai taimi e finagalo ai le Atua ina ia fa'aogaina lo tatou ola i so'o se feau ma so'o se galuega ua finagalo i ai. A o le fa'afitauli, e le o lelei la tatou fa'alogo, ma tatou lagona foi, ae ua tatou fa'atutugata e fa'atino ma fa'ataunu'u. O le toe fafagu, ia lelei la ta fa'alogo i le valaau mai o le Atua. Ia tatou augofie e ofo atu le ola mo le Alii, e auauna ai ma fa'aoga le ola mo Ia.

### **Uiga o Upu:**

1. taupou - teine e le'i faia se tane.
2. Taumanatunatu - tau fa'asolosolo mafaufauga
3. fa'amalumalu - tumau i ona luga

### **A'OA'OGA:**

1. 'Aua le masalosalo i le valaau mai o le Atua.
2. Talitonu ma le loto fa'atuatua.
3. Ia lagona le fa'atauva'a i luma o le Atua.

Fa'afetai mo le galuega o lenei Aso Sa, ia saili se pese ma fai se tatalo e fa'ai'u ai le vasega.

## ***IA MANUIA LE ASO SA!!***

### **ASO SA NOVEMA 19, 2023**

**MATAUPU X1: "I TULU'IGA O LE LALOLAGI"** (To the ends of the earth)

**TUSI FAITAU:** Galuega 1: 1-11

**SINI:** Ia malamalama tamaiti, o le galuega tala'i e leai sona muta'aga e fa'aauau pea.

### **FESOASOASOANI MO FAIAOGA:**

Ua toe nei o se aga ona tatou taunu'u lea i le fa'ai'uga o a tatou galuega mo Aoga Aso Sa a le fanau. Malo le folau fa'afetai le galulue i a outou susuga i faiaoga, ua se toa ma outou i le fa'atinoina o la outou pito laau aua fanau ma lo latou ola fa'aleagaga. E le auaoa le silasila a le Atua e tusa o la outou galuega, o Ia foi na te fa'amanuia i lo outou tautiga. Ia tatou fa'amalolosi pea i a tatou su'esu'ega i le tusi faitau ua tu'uina atu mo le mataupu.

### **FESOASOANI MO LE MATAUPU:**

Tatou te talanoa loa i le tulu'iga o le lalolagi, ua tatou talanoa i le muta'aga. Ua tatou talanoa i le mea e pau ma gata mai ai le lalolagi. Ua tatou talanoa i le fa'atausi'usi'uga. O lona uiga, e leai lava se fa'amoemoe e toe fa'aauau, mo se isi la'asaga po'o se isi fa'aopoopoga le tele o le lalolagi. O lona uiga, e peisea'i e foliga mai, o mea uma lava e i ai lona muta'aga.

Peita'i o le molimau maumaututu a Luka i le tala sa faitauina, o lo'o atagia mai ai, o le Tala Lelei ma le galuega tala'i, e leai sona gata'aga ma sona muta'aga. E fa'aaau pea ma fa'aaau pea. O le tusi faitau o lenei taeao, o lo'o fa'amatalaina e Luka o le mafutaga fa'ai'u a Iesu ma ona so'o. O lea ua o'o i lona ituaso e tatau ai ona foi atu i le Tama. Peita'i, o lo'o mamafa pea i lona finagalo le galuega fa'aaau lea o le a tu'uina atu nei i le auso'o latou te fa'aaau.

Ae ala ona atugalua le Alii Fa'aola, ona foi o lea lava e silafia lelei e Iesu le tulaga fa'aletonu o lo'o i ai le ola fa'atuatua o lona auso'o. A lea na matua aliali lava i le taimi na puapuagatia ai le Alii, i le ola fa'afiti, ma le tutu mamao, atoa ai ma le lalafi i totonu o se nofoaga vaapiapi ina ua maliu Iesu. Le ala lea na ia toe fetalai fa'amalosi ai i lona auso'o. *“O le a maua e outou le mana, pe a afio ifo le Agaga Paia i luga ia te outou, e fai foi outou ma molimau ia te a'u i Ierusalem, ma Iutaia uma lava ma Samaria, e o'o lava i tulu'iga o le lalolagi.”*

O le upu moni lava, e le oge auala le Atua, e le mafai foi ona mate so'o se fa'amomoe e finagalo i ai le Atua. Aua foi, o le mea egata ai le malosi o le tagata, o i'ina e amata ai le malosi o le Atua, o le mea e muta ai le iloa o le tagata, o i'ina e amata ai le silafia ma le silisili ese o le Atua. Lea lava ua fetalai manino le Fa'aola, e le tu'u aunoaina i latou, ae e maua e i latou le fesoasoani, e maua e i latou le mana, le malosi ma le agava'a e fa'aaau ai le galuega e pei ona tapenaina ai i latou e Iesu i aso e tele.

Peita'i, e ao lava ina fa'atali ma le onosa'i. O le poloaiga lea a Iesu. *“Ia le tuua Ierusalem, a ia fa'atali i le mea na folafolaina e le Tama.”* O le a lea mea? O le papatisoina o i latou e le Agaga Paia. Aisea? Leaga o le Agaga Paia lea e latou te maua ai le malosi ma le lototele, e fa'atino ai le feau ma le galuega a le Alii, e aunoa ma sona muta'aga.

O le fa'amanatu foi lea mo tatou tamaiti. E leai se mea e gata mai ai lo tatou malosi, pe afai e 'au i tatou ma tatou fa'amoemoe i le Agaga Paia o le Atua, e na te fesoasoaniina i tatou. O a mea e gata mai ai lo tatou iloa ma lo tatou malosi, ia tatou manatua lelei, o le mea e gata mai ai lo tatou potu ma lo tatou iloa, e amata ai i'ina le silisili ese o le Atua soifua. 'Aua ne'i galo, ia tatou fa'amoemoe i le Agaga Paia o le Atua, e fesoasoani i so tatou vaivai.

### **GALUEGA FA'ATINO: Taliga Fesili**

1. O ai le fesoasoani o lo'o fa'atalitali i ai le au so'o?

*Tali:* O le Agaga Paia

2. O fea latou te fa'atalitali ai mo lona afio mai?

*Tali:* O Ierusalem

3. O ai le tusitala o le tusi?

*Tali:* O Luka

**PESE:** Pese ma Viiga 114

### **A'OA'OGA:**

1. O le Agaga Paia lo tatou fesoasoani sili.

2. Ofoina lo tatou ola e fai ma molimau o le Tala Lelei.

3. 'Aua ne'i muta le fa'amoemoe i le Atua.

**MANUIA TELE LE ASO SA!!**



## **ASO SA NOVEMA 26, 2023**

### **MATAUPU: “SUEGA LONA TOLU”**

**SINI:** Ia fa'amanatu pea i tamaiti mataupu sa fa'amatalaina, ina ia teufatu pea tala o le Tusi Paia i o latou mafaufau ma a'oa'oina ai pea o latou olaga.

### **FESOASOANI MO FAIAOGA:**

Ua fa'amalo atu lava le pale fa'afetai foi le onosa'i i tiute ma faiva o lo'o feagai ai pea ma outou, e ui lava ina feagai tatou ma fa'afitauli i le ala, ae fa'afetai i le Atua mo lana tausiga i lo outou soifua ma lo tatou ola. Talitonu lava o lo'o taoto i le agatonu le fa'agasologa o le tatou galuega o lenei tausaga, ae o le fa'amanatu lava ina ia tautuana a tatou suega ina ia fa'ataunu'u, ma 'ia saunia pea ni nai fa'aailoga mo le fanau e fa'afiafia ai pea e o atu i le Aoga Aso Sa.

### **Fesili ma o latou tali**

1. O le a le uiga o le upu fa'atoafaiava?

Tali: O lo'o fa'atatau ia Iesu (o le atali'i fa'atoa fa'aipoipo)

2. O le a le uiga o le ta'utinoga a Ioane e pei ona ta'ua i le mataupu?

Tali: O le uiga o le ta'utinoga a Ioane, se'i tali atu ai i nisi o finauga a le 'au so'o ma Iutaia i le mataupu e fa'atatau i le papatisoga na fai e Ioane.

3. Ae o le a se ata po'o se feau o lo'o ta'u mai e Ioane e tusa ma le tala?

Tali: O le ata o lo'o aumai e Ioane, ia lagona le fa'atauva'a o le tagata e tusa ma so'o se tofiga ua valaauina.

4. O ai le uo a le fa'atoafaiava e tusa ma le tala?

Tali: O Ioane

5. O le a se a'oa'oga sa e maua mai i le mataupu sa aumai i le tusi o Ioane?

Tali: E tele a'oa'oga, ae o se tasi a'oa'oga taua, ia lagona lo tatou fa'atauva'a.

6. O le a se fa'atatau o le tusitala o Luka e uiga i le mataupu, I tulu'iga o le lalolagi?

Tali: O le uiga, o le Talalelei e leai sona gata'aga ae fa'aaauu pea le tala'iina.

7. Aisea na fefe ma le mautonu ai Maria ina ua o'o i ai le fa'aaliga a le Agelu?

Tali: Ona fa'atoa tupu lea o se mea fa'apea i lona olaga ma e le o malamalama foi i le uiga o ia mea.

8. O ai le tusitala o le tusi o Galuega?

Tali: O Luka

9. O le a le manatu o Iesu i lona 'au so'o a'o le'i tu'ua e Ia?

Tali: Na silafia lelei e Iesu e le o mautonu le 'au so'o pe a tu'ua i latou.

10. O le a le fa'atonuga a Iesu na fai i lona au so'o ina ua sauni e tu'ua i latou?

Tali: Ina ia latou o e fa'atalitali i Ierusalem, o le a auina mai le Agaga ina ia maua e i latou le mana e fai ai le galuega tala'i.

Fa'afetai lava mo le fa'ataunu'uina o suega a le fanau, ia sania se pese ma fa'ai'u e le Faiaoga le vasega i le tatalo.

## **ASO SA TESEMA 03, 2023**

### **MATAUPU X11: “E FA'AOGA E LE ATUA SO'O SE TAGATA E FOLAFOLA LANA UPU”**

(God can use anyone to preach his word)

**TUSI FAITAU:** Efeso 3: 7-13

**SINI:** Ia malamalama le vasega, e fa'aogaina e le Atua tagata uma mo lana galuega tala'i.

#### **FESOASOANI MO FAIAOGA:**

Ua tatou o'o mai i le Masina mulimuli o lenei tausaga, fa'amalo atu lava le galulue, fa'afetai foi le taupati i feau ma galuega fa'atino o lenei tausaga. Talitonu le manatu, e ui lava sa fesoua'ina le tatou folauga i le tele o fa'afitauli, ae sa le'i tu'ulafoa'ina i tatou e le Atua. Ae tatou alo loa mo mataupu o totoo o lenei Masina.

#### **FESOASOANI MO LE MATAUPU:**

“O se le ave lona satauro, ma ua le mulimuli mai ia te a'u, e le mafai ona fai o ia ma o'u so'o.” O le ala tataua lea i so'o se tagata, ona fa'aoga tataua avanoa taua, ua tofifi ma filifilia ai, aua a fa'atamala ma fa'atalale, ona moni ai lea o le upu, ua mele manuia. O tofiga uma foi, ua i ai ta'iala e fa'atonutonu ai le tiute tauave a le tagata. Tasi lea o aiaiga tupito e pei ona toe fa'amanatu mai e le Aposetolo o Paulo. O le Aposetolo ua filifilia, e amo le satauro o Keriso ma mulimuli i tulaga a'ao o Iesu.

E peisea'i ua toe fa'amanatu mai e Paulo i lenei faitauga, taimi o lona laitiiti. Aemaise o lona sauaina o le au Kerisiano sei'a o'o i le fa'aogaina o ia e le Atua e folafola lana upu ma tala'i le Tala Lelei i tagata uma. O le ta'utinoga lea a le Aposetolo ua fa'ailoa atu i le Ekalesia i Efeso, i le galuega a le Atua e fa'aogaina ai lo tatou itiiti ma amanai'aina ai lo tatou fa'atauva'a. O lona uiga, e taua le fuafua tataua, taga'i lelei, ma mata'alia. Oe le tama ma le teine aoga, e itiiti oe ae taua i le Atua. O le finagalo o le Atua, ia fa'amaoni i nai mea itiiti, e manuia ai lau aoga, e manuia ai lou aiga, aemaise o le Ekalesia

O le feau lea mo tatou le fanau, e fa'aogaina e le Atua lo tatou itiiti ma lo tatou fa'atauva'a. Ae ala ona le fa'aogaina e le Atua, ona o i tatou lava. Tatou te fa'amauualuluga, tatou te fa'ama'imaui taimi, ma tatou fia malolosi. O Iesu Keriso, sa le manatu i sona mamalu, ma sona lava lelei, ae na fa'atino lana auaunaga mo le manuia i lona malo fa'avavau.

#### **GALUEGA FA'ATINO: Taliga fesili**

1. O ai o lo'o ave i ai le tusi a le aposetolo o Paulo e tusa ma le mataupu?  
Tali: O le Ekalesia i Efeso
2. O le a le mea lea e toe fa'amanatu e Paulo i lana tusi lea ia Efeso?  
Tali: Ua toe fa'amanatu ai taimi o lona laitiiti aemaise o lona sauaina o le au Kerisiano, ae ua fa'aogaina e le Atua mo lana galuega tala'i.
3. Aisea e le fa'aogaina ai e le Atua le tagata?  
Tali: O le tagata lava ia, ona o lona fia malosi.

#### **A'OA'OGA:**

1. Ia e fa'amaoni i lou valaauina.
2. E leai se mea e faigata i le Atua, pe a talitonu ma fa'atuatua i ai.
3. E fa'aogaina e le Atua lo tatou itiiti ma lo tatou fa'atauva'a.

**PESE:** Mulimuli, mulimuli ia Iesu (Pese ma Viiga)

## **ASO SA TESEMA 10, 2023**

**MATAUPI X111: “O LE ALA FILEMU”** (The way of peace)

**TUSI FAITAU:** Isaia 35: 1-10

**SINI:** Ia malamalama le vasega, o le Atua, o le ala filemu lava lena.

### **FESOASOANI MO FAIAOGA:**

Ua fa'amalo le folau fa'afetai foi le taupati e tusa ai ma lo outou soifua valaauina i tiute ma faiva ese'ese o lo'o outou galulue ai. E le taumate le tele o faigata o le ala umi sa tatou ui mai ai, ae peita'i, e le'i tu'ulafoaina lava i tatou e le Atua. O le mea lea e ao lava ona tatou saga fa'afetai a'e i le Atua, aua o ia na lo tatou ta'ita'i malaga sili. E ui lava ua tatou iai i le siu'i o tatou galuega, ae tatou fa'amalolosi pea e fa'ato'aga ona fai a tatou su'esu'ega i le tusi faitau o le mataupu ua tu'uina atu. Ia manuia tele le tapenaga.

### **SINA FA'ASOA MO FAIAOGA:**

O le o fai nei, o se savaliga e umi, ae le'o taimi uma o le savaliga e taugamalie. E fa'apena le olaga o le nu'u o Isaraelu; e lutia pea i le tele o faigata ma lailoa ai, ona o le le mausali o o latou loto i le Atua. A o le Atua ma lana fa'amasinoga amiotonu, e le lavea'iina ai se tagata e fiafia pea e fai le sese ma le agasala.

O le tatou tusi faitau o lenei taeao, o le valoaga a le Perofeta o Isaia fai mai; “O le a o'o mai le taimi sili ona fiafia ma filemu ai le nu'u; pe a o'o ina tafiese le agasala mai le nu'u, ma alolofa moni tagata i le Alii, e ala i le salamo ma liliu mai ia te Ia.” Aua o le fa'amasinoga tonu ma le alofa o le Atua, e iloa ina ua inoino tagata i le agasala. O le uiga tonu lea o la tatou mataupu o lenei Aso Sa. “O le ala filemu”

E le o se ala savali, ae o le olaga sa'o ma tataua ona tausisia ma savalia e tagata, e taunu'u ai i le fiafia ma le filemu moni, ina ua avea i latou ma tagata ua togiolaina. O le a tauaveina, fa'amalosia, ma fofu e le Atua le gasegase o lona nu'u, ma avatu i ona tagata le olaga taumasuasua, e ala i le loto ua tumau moni ma atoatoa i le Alii.

O fatiatama'i uma e tafiese le Alii mai le ala o ona tagata, ina ia avea ma ala laulelei ma saogalemu e savavali ai, ona o le mea lea e mo'omia e tagata uma. O le taimi mulimuli o le a filemu, ma sagatonu mea uma o le ola. O le a avea Karamelu ma Sarona ma eleele lafulemu, e tulimata'i i taimi o le seleselega o fuata, ona o le tele ma le fua feti'iti'i o le lafanua. E le toe i ai ni manu fea'i, o le a savavali i le ala sa, na o e ua togiolaina e ui ai. Latou te alalaga foi ma pepese fiafia, ona o se taunuuga e le'i i ai muamua o le a taunu'u i ai; aua o le a avea lo latou nu'u ma nu'u lelei ma malu puipua e le Atua.

Ioe tamaiti, o le olaga foi lea e tataua ona tatou olaina, ma tatou savavali ai ma le fiafia. O le ola mama ma aloalo ese mai le agasala, e taunu'u manuia ai. O le taulaga fa'aola foi na ofo mai ai le soifua paia ma le mama o Iesu, ina ia magalo ma ola mama tatou uma, e ala i le fa'atuatua.

### **Uiga o Upu ma Fuaitau:**

- a). vao lafulafu – Eleele na o le vao tuitui, e le fua mai ai ni fua lelei.
- e). Karamelu ma Sarona – O vaega eleele o le nu'u, o le a fua tele mai.
- i). Aila – o le manu tele, vave, e ta'a i atu mauga, e le maua i Samoa.
- o). serapi – e fa'asino i eleele vevela ma matutu.

## **GALUEGA FA'ATINO: Faitau lelei le Tusi Paia, ona tali mai lea o fesili o lo'o i lalo.**

1. O ai e fa'asino i ai le upu “latou” o lo'o i le laina muamua lava o le fuaiupu muamua?  
Tali: E fa'asino i tagata o le nu'u o le Atua.
2. Aisea e olioli ai le vao lafulafua, ma tutupu le tele o mea o ta'ua i le fuaiupu 1&2, ona o i latou o ta'ua?  
Tali: E olioli ma tutupu suiga matagofie o ta'ua, ina ua salamo ma toe foi le nu'u i le Atua.
3. O le fa'aiuga o le f.4 o lo'o fai mai...e afio mai lava o ia ma fa'aola ia te outou...O le a le taimi e afio mai ai le o lo'o ta'ua o le fa'aola?  
Tali: O le taimi e salamo ai le nu'u ma lafoa'i le agasala, ae fa'atuatua tumau i le Atua.
4. Aisea e le sese ai se malaga valea e ui i le ala o lo'o ta'ua o le “ala sa” i le f.8?  
Tali: E le sese, aua pe valea lava i le ta'u a tagata, ae mautinoa, o tagata o lo'o ui ai; o tagata lelei ma sao i luma o le Atua. O lo'o manino mai foi, o le ala lea, e le ui ai se tagata leaga.
5. O ai tagata ia ua togiolaina o lo'o ta'ua i le f.10?  
Tali: O tagata ua salamo fa'amaoni ma ua foi i le Atua i le loto fa'atuatua.

## **A'OA'OGA:**

1. E filemu ma fiafia ala o le Atua.
2. O le ala sili lava o le Atua.
3. O ala o le Alii, e le ui ai se tagata agasala.

**PESE:** 219 “E manuia lava”

## ***IA MANUIA LE ASO SA!!***

**ASO SA 17, 2023**

**MATAUPU XIV: “SUEGA FA'AI'U O LE AFA LONA LUA O LE TAUSAGA”**

**SINI:** Ia su'esu'eina ai mafaufau o Tamaiti po'o manatua tala mai le Tusi Paia sa fa'amatalaina i mataupu ta'itasi.

## **FESOASOANI MO FAIAOGA:**

Ua tatou o'o mai i le fa'ai'uga o a tatou galuega fa'atino o lenei tausaga, ua tigi pao ai nei le uto e pei o le faiva i tapalega, ua malo le galulue fa'afetai fai o le faiva. E ui a i le tele o fita na feagai ma tatou I le ala, ae fa'afetai i le Atua sa fai ma o tatou ta'ita'i malaga i le tatou folauga, lea ua tuta ai i nu'u lelei lo tatou Sa folau. Ae alo ane loa e fa'ataunu'u la tatou suega mulimuli o lenei foi tausaga, o le tu'u alalo lava ina ia saunia ni nai fa'ailoga mo le vasega e fa'afiafia ai i latou ma fa'auma lelei ai la tatou vasega o lenei tausaga.

## **VAEGA I: Fesili ma o latou tali**

1. O ai le igoa o le to'alua o Aapo?  
Tali: O Isepela

2. O se auala lelei na maua ai e Aapo le tovine a Napota?  
Tali: E leai, ona na oti ai Napota i le auala na faia e Iesepela.
3. O ai la le igoa o le auauna a le Atua lea na ia ave le feau ia Aapo?  
Tali: O Elia
4. O le a la se feau o le Talalelei sa maua mai i le tala ia Aapo?  
Tali: O le feau o le Talalelei, e ui sa le lelei le mea na faia e Aapo ma lona to'alua, ae na ia salamo ma toe fa'amaulalo lona loto ma ia foi atu i le Atua.
5. O le a tonu lava lea mea e ta'u o le onosa'i?  
Tali: O le onosa'i, o le lavatia lea tatali tiga ma faigata e o'o mai.
6. O le a tonu le taimi e iloa ai le onosa'i?  
Tali: O le taimi o tofotofoga
7. O le a le uiga o le upu fa'atoafaiava?  
Tali: O lo'o fa'atatau ia Iesu (o le atali'i fa'atoa fa'aipoipo)
8. A'o ai le igoa o le uo a le fa'atoafaiava e pei ona ta'ua i le mataupu?  
Tali: O Ioane
9. O le a se mea o lo'o toe to manatu ai Paulo e tusa ma lana tusi i le Ekalesia i Efeso?  
Tali: O lona sauaina o le au Kerisiano, ae ua fa'aogaina o ia e le Atua e tala'i le Talalelei.
10. Tusi mai lava i ou lava manatu, pe fa'amatala mai i ou lava lagona ni a'oa'oga taua sa e maua mai i le tele o tala mai le Tusi Paia sa fa'amatalaina.

## **VAEGA II: Fa'afetaui upu ma o latou uiga sa'o.**

1. fua feti'iti'i – o le vao tuitui e le fua ma ai ni fua lelei
2. fuata – o le manu e ta'a i atumauga
3. vao lafulafu – ua tele fua o laau
4. Karamelu ma Saronā – o le vaitau po'o le taimi
5. Aila – o vaega o le nu'u, o le a fua tele mai

Ia saili ane se pese ma fa'auma le vasega i le tatalo.

***MALO LAVA LE FA'AMALOLOSĪ, FA'AFETAĪ LE ONOSA'O, IA MANUIA TELE LE TU'UAGA IA MANUIA FOĪ LE KERISIMASI MA LE TAUSAGA FOU. ALOFA TELE ATU MO OUTOU.***



**Tautua Printing Press**  
**Congregational Christian Church of American Samoa**  
1 Kanana Fou Street, Box 1537  
Pago Pago, American Samoa 96799  
[www.efkasonline.org](http://www.efkasonline.org)